

قسم الاستماع

الاستماع هو أول قسم راح تختبره في الستيب، ويكون عبارة عن ٢٠ سؤال عليك تجاوبهم في خلال ٢٥ دقيقة. هو أصغر قسم في الاختبار عكس قسمي القراءة والجرامر لكن يحتاج يكون تركيزك جدا قوي عشان يمديك تسمع المقطع بتركيز وتقرأ الأسئلة وتختار الإجابة الصح.


المقاطع اللي راح تسمعها تكون دايمًا طرفين يتكلمو مع بعض وما حتكون صعبة من ناحية التراكيب اللغوية والكلمات المستخدمة، لكن هو عبارة عن مهارة استماع تحتاج تكون متعود على الاستماع وفهم الموضوع من خلال السمع فقط بدون قراءة.

في القراءة تكون متعود أنه تقرأ براحتك وتوقف على الكلمة اللي منت فاهمها وتحاول تخمن ايش معناها من السياق، لكن الاستماع حتسمع مرة واحدة أشخاص يتكلمو بسرعة وعليك تفهم الموضوع وتخمن إجابة السؤال بدون ما ترجع تسمع اللي فاتك مرة ثانية ودا التحدي الحقيقي في قسم الاستماع.

في الاختبار حيكون عندك ١٥ ثانية لقراءة كل سؤال قبل ما يشتغل المقطع، يعني إذا المقطع عليه سؤالين حيكون عندك ٣٠ ثانية كاملة لقراءة الأسئلة، صدقني ١٥ ثانية مهية قليلة دا الوقت من ذهب راح تستغله ويحل لك أزمة قسم الاستماع من خلال تطبيق تقنية استغلال الوقت.

تكنيكة استغلال الوقت

في الاستماع ما حيمديك وأنت بتسمع المقطع تقرأ السؤال وتفهمه وتحله، كدا راح تتشتت وممكن تفوتك الإجابة وأنت بتسمع بسبب التشتت فمخك لازم يكون عارف ايش بالزبط المعلومة المطلوب منك تعرفها، عشان لما تسمع المقطع تكون جاهز بس تلقط الإجابة من خلال الكلام. وهنا يجي دور تكنيكة استغلال الوقت.



هذي التكنيكة تتكون من ٤ خطوات أساسية جدا مهم تطبيقها في خلال وقت قراءة الأسئلة سواء كان ١٥ ثانية أو أكثر، حيعتمد الوقت على عدد الأسئلة اللي عليك تجاوبها.

١- اقرأ السؤال وافهمه كويس:

اقرأ السؤال حبة حبة وحاول تخمن ايش موضوع السؤال أو الفكرة الأساسية اللي يسألك عنها.

٢- حدد الكلمات الدلالية:

بعد قراءة السؤال حدد الكلمات الدلالية المهمة اللي تساعدك تلقط الإجابة بسرعة وأنت بتسمع.

Q1: Where does this conversation most likely take place?

A. at a birthday party.


B. at a school.

C. at a park.

D. At a bus.

في دا السؤال يبغى يعرف فين المحادثة صارت، هذي خلاصة السؤال اللي تحتاج تركيز عليها وتلقطها وأنت بتسمع باقي الكلام وهو مهم تعرفه.

٣- حدد الكلمات الأساسية في الاختيارات:



Q1: Where does this conversation most likely take place?

A. at a birthday party.

B. at a school.

C. at a park.

D. At a bus.

وأنت بتقرأ الاختيارات لا تقرأ كل الجملة، عليك تحدد بس الكلمة الأساسية أو الدلالية خاصة إذا كانت الاختيارات طويلة.

٤- ركز مع المقطع والقط الإجابة الصح:

وأنت بتسمع المقطع احتمال يذكر لك اختيارين بشكل يلخبط يعني يقول أنا كنت حاجي الموعد الساعة ٧ لكن كان الطريق زحمة فوصلت الساعة ٨ فالإجابة حتكون ٨، مع أنه قال الاثنين فأنت عليك تكون مرة مركز وتلقط الإجابة الصح فيهم.

هذي باختصار تكنيكة استغلال الوقت، في البداية طبيعي تحس الموضوع صعب ويأخذ منك وقت طويل ممكن ٢٠ أو ٣٠ ثانية، لكن مع الاستمرار في التدريب حيمديك تطبق التكنيكة في خلال ١٥ ثانية بالزبط وحتكون جاهز أول ما يبدأ المقطع الصوتي تهجم وتحل على طول.

تكنيكات صغيرة

بالإضافة لتطبيق تقنية استغلال الوقت، سيكون عندك تكنيكات صغيرة تساعدك تستغل كل ثانية عندك وتبدع أكثر في حل قسم الاستماع.

أولاً: أشياء عليك تسويها:

١- استغل ترتيب الأسئلة:

الأسئلة في الاختبار دائماً تيجي مرتبة، يعني ما راح يجاوب سؤال رقم ٤ قبل سؤال رقم ١، عشان كذا وأنت بتسمع المقطع الصوتي خليك مركز على ترتيب الأسئلة لأنه حينئذ بتنتقل بسرعة بين الأسئلة، فإذا سمعت كلمة من الكلمات الدلالية في السؤال الثاني اعرف أنه فاتك السؤال الأول وعليك تكمل.

٢- ركز على إعادة الصياغة:

وأنت بتسمع المقطع الصوتي ممكن يقول الإجابة أو المعلومة المحددة في السؤال لكن بصياغة مختلفة، فعليك تكون مركز عشان تعرف أنه هذي نفس الإجابة اللي تحتاجها.

٣- استبعد الاختيارات:

وأنت بتسمع المقطع خلي تركيزك تلقط الكلمات الدلالية، ولما تحس أنه قال الإجابة أو قرب منها عليك تقارن وتحط عينك على الاختيارات الموجودة واستبعد بشكل سريع بعيونك الاختيارات اللي ما ذكرت أو ذكرها وغير الاختيار عشان يمدك توصل للإجابة الصح أسرع وتقل احتمالية الخطأ.

ثانياً: أشياء عليك لا تسويها:

١- تدون ملاحظات:

في الاستماع راح يتكلم بسرعة وما راح يتعاد الشريط مرة ثانية، ما يحتاج تشتت نفسك وتكتب ملاحظات أفضل أنه تخلي كل تركيزك مع المقطع الصوتي وعيونك على السؤال عشان تلقط الإجابة.

٢- تقرأ الاختيارات:

أنت عندك فقط ١٥ ثانية، خلي تركيزك خلالها على السؤال مو الاختيارات عشان يمدك تحدد الكلمات الدلالية وتلقط الإجابة وأنت بتسمع.

٣- تحدد على السؤال:

إذا فاتك سؤال خلاص اسحب عليه وكمل، لا تحدد على السؤال وتجلس تحاول تتذكر إيش كانت الإجابة عشان ما تفوتك أسئلة أكثر بسبب عدم تركيزك مع المقطع الصوتي.

التدرب على الاستماع

هذه الخلاصة باختصار في قسم الاستماع مهو قد كذا صعب، لكن يحتاج منك تركيز وتدريب وراح يمديك تجيب درجة حلوة في دا القسم.

ولأنه التدرب عمود أساسي من الأعمدة الخمسة في مذاكرة الستيب، راح تبدأ دحين في التدرب بشكل عملي على مواضيع قريبة من المواضيع اللي راح تيجي في الاختبار وبنفس الصعوبة تقريبا والأسئلة موجودة.

كل اللي عليك تسويه تسمع وتدريب وإذا لقيت الموضوع صعب وإذا غلطت هنا يجي الجزء الكبير أنك تعيد المقطع مرة ثانية وتشوف النص حقه وتعلم من أخطائك، وصدقني مع الاستمرار حتلاقي نتائج رهيبة.

طريقة التدريب:

ومهم تتدرب بنفس طريقة الاختبار الحقيقي، وهذه الخطوات حتساعدك تحاكي طريقة الاختبار فمهم تسويها.

١- حط مؤقت ١٥ ثانية واقرا فيها الأسئلة على السريع.

٢- حدد الكلمات الدالية في السؤال.

٣- خلي تركيزك أنك تلقط الإجابة الصح.

٤- لا توقف المقطع الصوتي وجاوب كأنه اختبار حقيقي.

٥- راجع أخطائك واتعلم منها.

المستوى البسيط
المقاطع قابلة للنقر للانتقال السريع

المقطع الصوتي	Practice Name	اسم التدريب	رقم التدريب
	Restaurant Order	الطلب من مطعم	١
	Hotel Reservations	حجز الفندق	٢
	New Friends	أصدقاء جدد	٣
	Physical Therapy	علاج بدني	٤
	Immigration and Customs	الهجرة والجمارك	٥
	Bookstore Shopping	متجر بيع الكتب	٦
	Train Tickets	تذاكر القطار	٧
	Homestay in the USA	الإقامة مع عائلة امريكية	٨
	Voicemail	البريد الصوتي	٩
	Clothing Styles	ستايل الملابس	١٠
	Tokyo Travel Guide	دليل طوكيو السياحي	١١
	Family Relationships	العلاقات الأسرية	١٢
	A Fun Day	يوم ترفيه	١٣
	Nice to Meet You	سعيد بلقائك	١٤
	Happy Birthday	عيد ميلاد سعيد	١٥

تدريبات الاستماع



المستوى المتوسط

المقاطع قابلة للنقر للانتقال السريع

المقطع الصوتي	Practice Name	اسم التدريب	رقم التدريب
	Pizza Delivery	توصيل البيتزا	١
	Travel on Sky Airlines	السفر على طيران سكاي	٢
	College Textbooks	كتب الجامعة	٣
	Career Search	البحث الوظيفي	٤
	Computer Jobs	وظائف الكمبيوتر	٥
	Grocery Shopping	البقالة	٦
	English Language Center	مركز اللغة الإنجليزية	٧
	Our Family Roots	جذور عائلتنا	٨
	Running Shoes	حذاء الجري	٩
	TV Guide	دليل التلفاز	١٠
	Medical Advice	نصيحة طبية	١١
	Water Conservation	المحافظة على المياه	١٢
	Jewelry Store	متجر للمجوهرات	١٣
	New York Travel	رحلة نيويورك	١٤
	Barbecue Party	حفلة شواء	١٥